

四庫全書

史部

欽定四庫全書

史部

西漢會要卷一至三

詳校官編修臣范來宗

編修臣程嘉謨覆勘

總校官知縣臣楊懋珩

校對官編修臣盧遂

謄錄監生臣李國興

欽定四庫全書

史部十三

西漢會要

政書類一

通制之屬

提要

臣等謹案西漢會要七十卷宋徐天麟撰天

麟字仲祥臨江人開禧元年進士調撫州教

授歷武學博士通判惠潭二州權知英德府

事蹟附見宋史徐夢莘傳傳稱天麟為通直

郎得之子夢莘之從子晁公武讀書志則

稱為夢莘之子考樓鑰攻媿集有西漢會要  
序曰徐思叔為左氏國記其兄祕閣商老為  
北盟錄已而思叔之子孟堅著漢官考次子  
仲祥又作漢會要商老夢莘之字思叔得之  
之字也然則史不悞而晁氏悞矣其書仿唐  
會要之體取漢書所載制度典章見於紀志  
表傳者以類相從分門編載其無可隸者亦  
依蘇冕舊例以雜錄附之分十有五門共三

百六十七事嘉定四年具表進之於朝有旨  
付尚書省藏之祕閣班固書最稱博瞻於一  
代禮樂刑政悉綜括其大端而理密文繁驟  
難得其體要天麟為之區分別白經緯本末  
一一犁然其詮次極為精審惟所採祇據本  
史故于漢制之見於他書者槩不採掇未免  
失之於隘又如輿服門中于司馬相如揚雄  
諸賦鋪張揚厲之語一槩摘入殊非事實亦

為有乖義例然其貫串詳洽實未有能過之者昔人稱顏師古為漢書功臣若天麟者固亦無媿斯目矣乾隆四十四年六月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

欽定四庫全書

西漢會要卷一

宋 徐天麟 撰

帝系一

帝號

豐公太上皇父也春秋晉史蔡墨有言陶唐氏既衰其  
後有劉累學擾龍事孔甲范氏其後也而大夫范宣子  
亦曰祖自虞以上為陶唐氏在夏為御龍氏在商為豕

韋氏在周為唐杜氏晉主夏盟為范氏范氏為晉士師  
魯文公世奔秦後歸於晉其處者為劉氏劉向云戰國  
時劉氏自秦獲於魏秦滅魏遷大梁都于豐故周市說  
雍齒曰豐故梁徙也是以頌高祖云漢帝本系出自唐  
帝降及于周在秦作劉涉魏而東遂為豐公豐公蓋太  
上皇父其遷曰淺墳墓在豐鮮焉及高祖即位置祠祝  
官則有秦晉梁荆之巫世祠天地綴之以祀豈不信哉  
由是推之漢承堯運德祚已盛斷蛇著符旗幟上赤協



于火德自然之應得天統矣

出本紀贊

太上皇高帝父太公也漢六年夏五月詔曰人之至親莫親於父子故父有天下傳歸於子子有天下尊歸於父此人道之極也前日天下大亂兵革並起萬民苦殃朕親被堅執銳自帥士卒犯危難平暴亂立諸侯偃兵息民天下大安此皆太公之教訓也諸王通侯將軍羣卿大夫已尊朕為皇帝而太公未有號今上尊太公曰太上皇十年秋七月太上皇崩葬萬年

出本紀

太祖高皇帝

字季諱邦之字曰國

沛豐邑中陽里人姓劉氏

母媼後追

尊曰昭

靈后 高祖為人隆準而龍顏美鬚髯左股有七十二

黑子寬仁愛人意豁如也及壯試吏為泗上亭長秦二

世元年立為沛公漢元年立為漢王五年二月甲午即

皇帝位于汜水之陽十二年夏四月甲辰帝崩于長樂

宮五月丙寅葬長陵羣臣曰帝起細微撥亂世反之正

平定天下為漢太祖功最高上尊號曰高皇帝

著紀十二年壽

五十諡

諡法無高以功高特起名

丞相相國

蕭何

大尉

盧綰

周勃

御史大夫

周苛

周昌

趙堯

孝惠皇帝

諱盈字曰滿

高祖太子也

母曰呂皇后

帝年五歲高祖

初為漢王二年立為太子五年為皇太子十二年四月

高祖崩五月丙寅即皇帝位明年改元七年秋八月戊

寅帝崩于未央宮九月辛丑葬安陵

著紀七年壽二十四諡柔質慈民

曰惠

相國 蕭何 曹參

右丞相 王陵

左丞相 陳平

太尉 周勃

御史大夫 趙堯

高皇后呂氏諱雄字曰野雞父單父人呂公好相人見高祖狀

貌因重敬之呂公曰臣少好相人相人多矣無如季相願季自愛臣有息女願為箕帚妾呂媼怒呂公曰公始

常欲竒此女與貴人沛令善公求之不與何自妄許與  
劉季呂公曰此非兒女子所知卒與高祖生孝惠帝魯  
元公主高帝五年尊王后曰皇后惠帝即位尊為皇太  
后太后立帝姊魯元公主女為皇后無子取後宮美人  
子名之以為太子惠帝崩太子立為皇帝年幼太后臨  
朝稱制四年少帝自知非皇后子出怨言皇太后幽之  
永巷五月丙辰立常山王弘為皇帝八年七月辛巳皇  
太后崩于未央宮既誅諸呂大臣相與陰謀以為少帝

及三弟為王者皆非孝惠子復共誅之

著紀八年

大傅

王陵

審食其

右丞相

陳平

左丞相

審食其

御史大夫

任敖

曹窋

張蒼

太宗孝文皇帝

諱恆字曰常

高祖中子也

母曰薄姬

高祖十一年

立為代王十七年秋高后崩

張晏曰代王之十七年也

大臣迎代王

入代邸羣臣從至上議曰丞相陳平等再拜言大王足

下子弘等皆非孝惠皇帝子不當奉宗廟大王高皇帝子宜為嗣願大王即天子位代王西鄉遜者三南鄉遜者再丞相平等奉天子璽符再拜上代王遂即天子位

後七年夏六月己亥帝崩于未央宮乙巳葬霸陵

著紀二十

三年壽四十六

孝景元年申屠嘉等奏德莫盛於孝文皇帝宜

為帝者太宗之廟制曰可

諡慈惠愛  
民曰文

改元前十六年 後七年

丞相

陳平

周勃

灌嬰

張蒼

申屠嘉

太尉 灌嬰

御史大夫 張蒼

圍

馮敬

申屠嘉

陶青

孝景皇帝

諱啟字曰開

文帝太子也

母曰竇皇后

文帝元年正月

立為皇太子後七年六月文帝崩丁未即皇帝位後三

年正月甲子帝崩于未央宮二月癸酉葬陽陵

著紀十六年壽

四十 諡布議行  
六 剛曰景

改元 前七年 中六年 後三年

丞相 申屠嘉 陶青 周亞夫 劉舍 衛綰



太尉周亞夫

御史大夫

陶青直不疑

晁錯

介

劉舍

衛綰

世宗孝武皇帝

諱徹字曰通

景帝中子也

母曰王美人

年四歲立

為膠東王七歲為皇太子十六歲後三年正月景帝崩

甲子太子即皇帝位後元二年二月丁卯帝崩于五柞

宮三月甲申葬茂陵

著紀五十四年壽七十一

孝宣本始二年詔尊

孝武廟為世廟

謚

威彊敵德曰武

年號

建元六年元鼎六年

元光六年元封六年

元朔六年太初四年

元狩六年天漢四年

太始二年 征和四年 後元二年 共著紀五十四年壽七十一

丞相

竇慶

許昌

田蚡

薛澤

公孫弘

李蔡

嚴青翟

趙周

石慶

公孫賀

劉屈氂

田千秋

太尉

田蚡

大司馬

衛青

霍去病

霍光

御史大夫

牛抵

趙綰

嚴青翟

韓安國

張敖

公孫弘

江播孫

李蔡

張蒼

石慶

卜式

兒寬

延廣

王卿

杜周

暴勝之

商立成

桑弘羊

孝昭皇帝

諱弗陵後止

武帝少子也

母曰趙婕妤

武帝後元

二年二月立為皇太子年八歲以侍中奉車都尉霍光

為大司馬大將軍受遺詔輔少主明日武帝崩戊辰太

子即皇帝位元鳳四年帝加元服元平元年夏四月癸

未帝崩于未央宮六月壬申葬平陵

著紀十三年  
壽二十一  
謚聖  
聞

周達  
曰昭

年號 始元六年 元鳳六年 元平一年

丞相 田千秋 王訢 楊敞 蔡義

大司馬 霍光

御史大夫 桑弘羊 王訢 楊敞 蔡義 田廣明

中宗孝宣皇帝

諱詢字曰謀

武帝曾孫戾太子孫也太子納

史良娣生史皇孫皇孫納王夫人生宣帝號曰皇曾孫  
生數月遭巫蠱事太子良娣皇孫王夫人皆遇害曾孫  
雖在襁褓猶坐收繫郡邸獄邴吉為廷尉監曾孫賴吉  
得全因遭大赦有詔掖庭養視上屬籍宗正元平元年  
四月昭帝崩無嗣大將軍霍光請皇后召昌邑王六月  
王受皇帝璽綬癸巳光奏王賀淫亂請廢太后詔曰可

光奏議曰孝武帝曾孫病已

潛邸名也

操行節儉慈仁愛人

可以嗣孝昭皇帝後奏可宗正德至曾孫尚冠里舍洗

沐賜御府衣太僕以軫獵車奉迎曾孫庚申入未央宮

見皇太后封為陽武侯已而羣臣奏上璽綬即皇帝位

元康元年詔更諱詢黃龍元年冬十二月甲戌帝崩于

未央宮

著紀二十五  
年壽四十二

初元元年正月辛丑葬杜陵平帝

元始四年尊孝宣廟為中宗

諡

聖善周  
閭曰宣

年號

本始四年  
五鳳四年

地節四年  
甘露四年

元康四年  
黃龍一年

神爵四年

丞相 蔡義 韋賢 魏相 丙吉 黃霸 于定國

大司馬 霍光 史高 張安世 霍禹 韓增 許延壽

御史大夫 周廣明 丙吉 于定國 陳萬年 蕭望之 黃霸 杜延年

高宗孝元皇帝 諱與字曰盛 宣帝太子也 母曰共哀 許皇后 宣帝微

時生民間年二歲宣帝即位八歲立為太子黃龍元年

十二月宣帝崩癸巳太子即皇帝位竟寧元年夏五月

壬辰帝崩于未央宮秋七月丙戌葬渭陵 著紀十六年 壽四十三

平帝元始四年尊為高宗廟 謚 行義悅 民曰元

年號 初元五年 永光五年 建昭五年 竟寧一年

丞相 于定國 韋玄成 匡衡

大司馬 史高 王接 許嘉 王鳳

御史大夫 陳萬年 夏禹 薛廣德 韋成 鄭弘

孝成皇帝 諱驚之字曰俊 元帝太子也 母曰王皇后 元帝在太子宮

生甲觀畫堂為世嫡皇孫宣帝愛之字曰太孫年三歲而宣帝崩元帝即位帝為太子竟寧元年五月元帝崩六月己未太子即皇帝位綏和二年三月丙戌帝崩于

未央宮四月己卯葬延陵

著紀二十六  
年壽四十五  
諡安民立  
政曰成

年號

建始四年  
永始四年

河平四年  
元延四年

陽朔四年  
綏和二年

鴻嘉四年

丞相

匡衡

王商

張禹

薛宣

翟方進

孔光

大司馬

許嘉  
師舟

王鳳

王音

王商

王根

王莽

御史大夫

張譔  
王駿

尹忠

張忠

王音

于永

薛宣

大司空

何武

師丹

孝哀皇帝

諱欣之  
字曰喜

元帝庶孫定陶恭王子也

母曰姬

年三

歲嗣立為王元延五年立為皇太子綏和二年三月成



帝崩四月丙午太子即皇帝位元壽二年六月戊午帝

崩于未央宮秋九月壬寅葬義陵

著紀六年諡恭仁短壽二十六折曰哀

年號

建平四年

元壽二年

大傅

孔光

丞相

孔光

朱博

平當

大司徒

馬宮

大司馬

傅喜  
王莽

丁明

王嘉

傅晏

韋賞

董賢

大司空

朱博

彭宣

王崇

御史大夫

朱博 孔光

趙元 何武

平當 彭宣

王嘉

王崇

賈延

孝平皇帝

諱衍字 曰樂

元帝庶孫中山孝王子也

母曰 衛姬

年三

歲嗣立為王元壽二年六月哀帝崩太皇太后遣車騎

將軍王舜大鴻臚左咸使持節迎中山王九月辛酉中

山王即皇帝位帝年九歲太皇太后臨朝大司馬莽秉

政百官總已以聽於莽元始二年更名

平帝本名箕 子今更名衍

告

祠高廟五年十二月丙午帝崩于未央宮

漢注云帝春 秋益壯以母

衛太后故怨不悅莽自知益疎簾弑之

有司議曰禮臣

謀由是生圖到臘日置酒藥中弑帝

不殤君皇帝年十有四歲宜以禮斂加元服奏可葬康

陵

著紀五年諡布網治  
壽十有四紀曰平

年號

元始五年

太師

孔光

太傅

王莽

太保

王舜

大司徒

馬宮

平晏

大司空

王崇

甄豐

西漢會要卷一

欽定四庫全書

西漢會要卷二

宋 徐天麟 撰

帝系二

太皇太后皇太后皇后

漢興因秦之稱號帝母稱皇太后祖母稱太皇太后適  
稱皇后妾皆稱夫人

外戚傳

昭靈后高祖母媼也嘗息大澤之陂夢與神遇是時雷

電晦冥太公往視則見蛟龍於上已而有娠遂產高祖

高祖即位追尊母媼為昭靈夫人

漢儀注云高祖母兵起時死小黃北後葬

於小黃作陵廟

呂后七年尊曰昭靈后

以本紀修

高祖呂皇后

見帝號

高祖薄姬生文帝年八歲立為代王出從子之代為代

太后文帝即位尊太后為皇太后孝景即位尊為太皇

太后前二年崩葬南陵

以外戚傳及本紀修下同

孝惠張皇后宣平侯敖尚帝姊魯元公主有女惠帝即

位呂太后欲為重親以公主女配帝為皇后呂太后崩  
廢處北宮孝文後元年薨葬安陵不起墳

孝文竇皇后景帝母也呂太后時以良家子選入宮太  
后出宮人以賜諸王各五人誤置籍代伍中代王獨幸  
竇姬生景帝文帝立數月公卿請立太子而竇姬男最  
長立為太子而竇姬為皇后景帝即位尊為皇太后建  
元六年崩合葬霸陵

孝景薄皇后孝文薄太后家女也景帝為太子時薄太

后取以為太子妃景帝立立薄妃為皇后無子立六年  
薄太后崩皇后廢廢後四年薨葬長安城東平望亭南  
孝景王皇后武帝母也嫁為金王孫婦生一女矣母臧  
兒卜筮曰兩女當貴欲倚兩女奪金氏納太子宫生三  
女一男男方在身時王夫人夢日入其懷以告太子太  
子曰此貴兆也未生而文帝崩景帝即位王夫人生男  
會薄皇后廢立王夫人為皇后立九年景帝崩武帝即  
位為皇太后元朔三年崩合葬陽陵



孝武陳皇后長公主嫖女也

嫖竇太后女也

初武帝得立為太

子長主有力取主女為妃及帝即位立為皇后元光五年賜皇后策曰皇后失序惑於巫祝不可以承天命其上璽綬罷退居長門宮後數年薨葬霸陵郎官亭東

孝武衛皇后字子夫為平陽主謳者武帝被霸上還過平陽主既飲謳者進帝獨說子夫主因奏送入宮元朔元年生男據遂立為皇后皇后立七年而男立為太子衛后立三十八年巫蠱事起皇后自殺宣帝立乃改葬

謚曰思后置園邑三百家長丞周衛奉守焉

孝武趙婕妤昭帝母也武帝巡狩過河間望氣者言此有奇女天子亟使使召之既至女兩手皆拳上自披之手即時伸由是得幸號曰拳夫人進為婕妤居鉤弋宮大有寵生昭帝號鉤弋子任身十四月乃生上曰聞昔堯十四月而生今鉤弋亦然迺命其所生門曰堯母門婕妤從幸甘泉有過見譴以憂死因葬雲陽後上疾病乃立鉤弋子為皇太子明日帝崩昭帝即位追尊婕妤

為皇太后發卒二萬人起雲陵邑

孝昭上官皇后祖父桀受武帝遺詔輔少主昭帝初立  
年八歲桀子安有女即霍光外孫因帝姊鄂邑蓋長公  
主內安女後宮為婕妤月餘遂立為皇后年甫六歲後  
桀安謀廢立事發覺宗族既滅皇后以年少不與謀亦  
光外孫故得不廢皇后立十歲而昭帝崩后年十四五  
云昌邑王即位尊為皇太后宣帝即位為太皇太后凡  
立四十七年卒年五十二建昭二年合葬平陵

宣帝祖母戾后本衛太子史良娣也巫蠱事起遇害宣帝即位追尊曰戾后

宣帝母悼后本史皇孫王夫人也名翁須生宣帝數月衛太子敗家人子皆坐誅宣帝即位追尊母王夫人諡曰悼后與祖母戾后皆改葬起園邑長丞奉守

孝宣許皇后元帝母也父廣漢坐論為鬼薪時宣帝養於掖庭號皇曾孫與廣漢同寺居廣漢有女平君年十四五當為歐侯氏子婦臨當入歐侯氏子死遂與曾孫

一歲生元帝數月曾孫立為帝平君為婕妤公卿議立  
皇后大臣白立許婕妤霍光夫人顯欲貴其小女道無  
從明年許皇后當娠顯使女醫淳于衍以附子并合大  
醫大九以飲皇后有頃曰我頭岑岑也藥中得無有毒遂  
崩謚曰恭哀皇后葬杜南是為杜陵南園

孝宣霍皇后大司馬大將軍博陸侯光女也母顯既使  
淳于衍陰殺許后顯勸光納之果立為皇后立三歲而  
光薨上立許后男為太子顯恚不食嘔血復教皇后令

毒太子皇后數召太子賜食阿保輒先嘗之后挾毒不得行後殺許后事頗泄顯與諸壻兄弟謀反發覺皆誅滅后廢處昭臺宮後十二歲徙雲林館乃自殺葬昆吾亭東

孝宣王皇后父奉光宣帝在民間數與奉光會有女十餘歲每當適人所當適輒死宣帝即位召入後宮為倂仔霍皇后廢後上憐許太子蚤失母於是選後宮素謹而無子者遂立王倂仔為皇后令母養太子自為后後

希見無寵封父奉光為邛成侯立十六年宣帝崩元帝即位為皇太后成帝即位為太皇太后成帝母亦姓王氏故世號太皇太后為邛成太后凡立四十九年年七十餘永始元年崩合葬杜陵稱東園

孝元王皇后成帝母王莽之姑也五鳳中獻入掖庭宣帝選送太子宮生成帝字大孫宣帝崩太子即位是為元帝立大孫為太子以母王妃為婕妤後三日立為皇后元帝崩太子立是為成帝尊皇后為皇太后哀帝即

位為太皇太后哀帝崩無子太皇太后以莽為大司馬  
共立中山王是為平帝平帝年九歲常年被疾太后臨  
朝委政於莽莽踐祚居攝太后力不能禁及莽即位更  
命太皇太后為新室文母年八十四建國五年崩合葬  
渭陵

孝元傅皇后哀帝祖母也少為上官太后才人自元帝  
為太子得進幸元帝即位立為婕妤生定陶恭王更號  
昭儀元帝崩傅昭儀隨王歸國稱定陶太后恭王薨子



代為王王母曰丁姬太后躬自養視成帝無繼嗣遂立  
定陶王為太子哀帝即位尊定陶恭王為恭皇哀帝傳  
太后為恭皇太后歲餘尊為帝太后丁姬為帝太后  
後又更帝太后為皇太后稱永信宮帝太后稱中  
安宮而成帝母太皇太后本稱長信宮成帝趙后為皇  
太后並四太后各置少府太僕元壽元年崩合葬渭陵  
稱老元傳皇后云

孝成許皇后大司馬車騎將軍平恩侯嘉女也元帝悼

傷母恭哀后居位日淺而遭霍氏之辜故選嘉女以配  
皇太子成帝即位立為皇后是時大將軍鳳用事威權  
尤盛其後比三年日蝕言事者頗歸咎於鳳矣而永谷  
等遂著之許氏后姊為媚道祝詛事發覺許后坐廢處  
昭臺宮後九年賜藥自殺

孝成趙皇后本長安宮人號曰飛燕成帝召入宮大幸  
有女弟復召入俱為婕妤許后廢乃立婕妤為皇后弟  
為昭儀姊弟頗寵十餘年卒皆無子成帝崩民間歸罪

趙昭儀皇太后詔治問皇帝起居發病狀昭儀自殺哀  
帝立尊趙皇后為皇太后哀帝崩王莽白太后貶皇太  
后為孝成皇后徙居北宮後月餘廢為庶人是日自殺  
哀帝母丁太后定陶恭王姬也哀帝即位尊恭王為恭  
哀皇帝丁姬為恭皇后後又更為帝太后建平二年丁  
太后崩上令起陵恭皇之園哀帝崩王莽秉政使有司  
奏舉丁傅罪惡貶傅太后號為定陶恭王母丁太后號  
曰丁姬又奏發恭王母及丁姬冢取其璽綬莽又周棘

其處以為世戒云

孝哀傳皇后定陶太后從弟子也哀帝為定陶王時傅太后欲重親取以配王王入為漢太子傅氏女為妃哀帝即位為皇后帝崩王莽白太皇太后廢為庶人自殺孝平王皇后安漢公莽女也平帝即位年九歲成帝母太皇太后稱制而莽秉政欲依霍光故事以女配帝太后不得已而許之明年遣大司徒宮等奉乘輿法駕迎皇后於安漢公第后立歲餘平帝崩莽立子嬰尊皇后

為皇太后莽即真以嬰為定安公改皇太后為定安公  
太后太后時年十八矣漢兵誅莽自投火中而死

雜錄

皇太后皇后公主所食曰邑

百官表

成帝即位匡衡上疏曰匹配之際生民之始萬福之原  
婚姻之禮正然後品物遂而天命全孔子論詩以關雎  
為始言夫上者民之父母后夫人之行不侔乎天地則  
無以奉神靈之統而理萬物之宜故詩曰窈窕淑女君

子好述言能致其正淑不貳其操情欲之感無介乎容  
儀宴私之意不形乎動靜夫然後可以配至尊而為宗  
廟主此綱紀之首王教之端也自上世以來三代興廢  
未有不由此者也願陛下詳覽得失盛衰之效以定大  
基采有德戒聲色近嚴敬遠技能

匡衡傳

自上為太子時以好色聞及即位皇太后詔采良家女  
杜欽因是說大將軍鳳曰禮壹取九女所以極陽數廣  
嗣重祖也必鄉舉求窈窕不問華色所以助德理內也

娣姪雖缺不復補所以養壽塞爭也故后妃有正淑之行則繼嗣有賢聖之君制度有威儀之節則人君有壽考之福廢而不由則女德不厭女德不厭則壽命不究於高年書云或四三年言失欲之生害也男子五十好色未衰婦人四十容貌改前以改前之容侍於未衰之年而不以禮為制則其原不可救而後徠異態後徠異態則正后自疑而支庶有間適之心是以晉獻被納讒之謗申生蒙無罪之辜今聖主富於春秋未有適嗣方

鄉術入學未親后妃之議將軍輔政宜因始初之隆建  
九女之制詳擇有行義之家求淑女之質母有必聲色音  
技能為萬世大法夫少戒之在色小弁之作可為寒心  
唯將軍常以為憂鳳白之太后太后以為故事無有欽  
復重言詩云殷鑒不遠在夏后氏之世刺戒者至迫近  
而省聽者常怠忽可不謹哉前言九女略陳其禍福甚  
可悼懼竊恐將軍不深留意后妃之制天壽治亂存亡  
之端也迹三代之季世覽宗宣之饗國察近屬之符驗



禍敗曷常不由女德是以佩玉晏鳴關雎歎之知好色  
之伐性短年離制度之生無厭天下將蒙化凌夷而成  
俗也故詠淑女幾以配上忠孝之篤仁厚之作也夫君  
親壽尊國家治安誠臣子之至願所當勉之也易曰正  
其本萬物理凡事論有疑未可立行者求之往古則典  
刑無考之來今則吉凶同卒搖易之則民心惑若是者  
誠難施也今九女之制合於往古無害於今不逆於民  
心至易行也行之至有福也將軍輔政而不蚤定非天

下之所望也唯將軍信臣子之願念關雎之思逮委政之隆及始初清明為漢家建無窮之基誠難以忽不可以遴鳳不能自立法度循故事而已

杜欽傳

河平元年夏四月己亥晦日有食之詔公卿百僚陳過失無有所諱光祿大夫劉向對曰四月交於五月月同孝惠日同孝昭其占恐害繼嗣是時許皇后專寵後宮希得進見中外皆憂上無繼嗣故杜欽谷永及向所對皆及之上於是減省椒房掖庭用度服御輿駕所發諸

宮官府及所造作遺賜外家羣臣妾皆如竟寧以前故事皇后上疏自陳以為時世異制長短相補不出漢制而已纖微之間未必可同若竟寧前與黃龍前豈相放哉家吏不曉今壹受詔如此且使妾搖手不得設妾欲作某屏風張於某所曰故事無有或不能得則必繩妾以詔書矣此誠不可行唯陛下省察故事以特牛嗣大父母戴侯敬侯皆得蒙恩以太牢祠今當率如故事唯陛下哀之今吏甫受詔讀記直豫言使后知之非可復

若私府有所取也其萌芽所以約制妾者恐失人理唯陛下深察焉上於是采谷永劉向所言災異咎驗皆在後宮之意以報之且曰吏拘於瀟亦安足過蓋矯枉者過直古今同之且財幣之省特牛之祠其於皇后所以扶助德美為華寵也咎根不除災變相襲祖宗且不血食何戴戾也傳不云虜以約失之者鮮審皇后欲從其奢與朕亦當瀟孝武皇帝也如此則甘泉建章可復興矣孝文皇帝朕之師也皇太后皇后成瀟也假使太后

在彼時不如職今見親厚又惡可以踰序皇后其刻心秉德謙約為右垂則列妾使有灋焉

外戚傳

永始元年帝欲立趙婕妤為皇后先下詔封婕妤父臨為列侯劉輔上書言臣聞天之所與必先賜以符瑞天之所違必先降以災變此神明之徵應自然之占驗也昔武王周公承順天地以饗魚鳥之瑞然猶君臣祗懼動色相戒況於季世不蒙繼嗣之福屢受威怒之異者序雖夙夜自責改過易行畏天命念祖業妙選有德之

世考卜窈窕之女以承宗廟順神祇心塞天下望子孫之祥猶恐晚暮今迺觸情從欲傾於卑賤之女欲以母天下不畏于天不媿于人惑莫大焉里語曰腐木不可以為柱卑人不可以為主天人之所不予必有禍而無福市道皆共知之朝廷莫肯壹言臣竊傷心自念得以同姓拔擢尸祿不忠污辱諫爭之官不敢不盡死唯陛下深察書奏上使侍御史收縛輔繫掖庭秘獄

劉輔傳

初哀帝即位成帝母稱太皇太后成帝趙皇后稱皇太

后而上祖母傅太后與母丁后皆在國即自以定陶共王為稱高昌侯董宏上書言秦莊襄王母本夏氏而為華陽夫人所子及即位後俱稱太后宜立定陶共王后為皇太后事下有司時師丹以左將軍與大司馬王莽共劾奏宏知皇太后至尊之號天下一統而稱引亡秦以為比喻詿誤聖朝非所宜言大不道上新立謙遜納用莽丹言免宏為庶人傅太后大怒要上欲必稱尊號上於是追尊定陶共王為共皇帝尊傅太后為共皇太

后丁后為共皇后郎中令冷褒黃門郎段熲等復奏言  
定陶共皇太后共皇后皆不宜復引定陶蕃國之名以  
冠大號車馬衣服宜皆稱皇之意置吏二千石以下各  
共厥職又宜為共皇立廟京師上復下其議有司皆以  
為宜如褒猶言丹議獨曰聖王制禮取法於天地故尊  
卑之禮明則人倫之序正人倫之序正則乾坤得其位  
而陰陽順其節人主與萬民俱蒙祐福尊卑者所以正  
天地之位不可亂也今定陶共皇太后共皇后以定陶



共為號者母從子妻從夫之義也欲立官置吏車服與太皇太后並非所以明尊卑亡二上之義也定陶共皇

號諡已前定義不得復改

師丹傳

三宮

王嘉傳貢獻三宮師古曰三宮天子太后皇后也

兩宮

五行志兩宮親屬師古曰謂太皇家王氏皇后家趙氏故云親屬

東宮

劉向傳依東宮之尊師古曰東宮太子所居也

中宮

哀紀食邑如中宮師古曰中宮皇后之宮

東朝

灌夫傳東朝廷辦之如淳曰東朝太后朝也

永信宮中安宮長信宮

傳昭儀皇太后稱永信宮帝太后稱中安宮成帝母太皇太

后稱長信宮

椒房

車千秋傳未央椒房師古曰椒房殿名皇后所居也以椒和泥塗壁取其溫而芳也

青蒲

史丹傳應劭曰青蒲非皇后不得至此

西漢會要卷二

欽定四庫全書

西漢會要卷三

宋 徐天麟 撰

帝系三

皇太子

漢二年六月立太子赦罪人

高紀

五年漢王即皇帝位太子曰皇太子

高紀

惠帝即位太后立帝姊魯元公主女為皇后無子取後

宮美人子名之以為太子 高后紀

孝文元年正月有司請蚤建太子所以尊宗廟也詔曰  
朕既不德上帝神明未歆饗也天下人民未有慝志今  
從不能博求天下賢聖有德之人而嬪天下焉而曰豫  
建太子是重吾不德也謂天下何其安之有司曰豫建  
太子所呂重宗廟社稷不忘天下也上曰楚王季父也  
春秋高閱天下之義理多矣明於國家之體吳王於朕  
兄也淮南王弟也皆秉德以陪朕豈為不豫哉諸侯王

宗室昆弟有功臣多賢及有德義者若舉有德以陪朕之不能終是社稷之靈天下之福也今不選舉焉而曰必子人其以朕為忘賢有德者而專於子非所以憂天下也朕甚不取有司固請曰古者殷周有國治安皆且千歲有天下者莫長焉用此道也立嗣必子所從來遠矣高帝始平天下建諸侯為帝者太祖諸侯王列侯始受國者亦皆為其國祖子孫繼嗣世世不絕天下之大義也故高帝設之以撫海內今釋宜建而更選於諸侯

宗室非高帝之志也更議不宜子啟最長敦厚慈仁請建以為太子上乃許之因賜天下民當為父後者爵一

級

本紀

孝景四年立皇子榮為皇太子

本紀

七年正月廢皇太子榮為臨江王四月丁巳立皇子徹

為皇太子賜民為父後者爵一級

本紀

孝武元狩元年夏四月丁卯立皇太子賜中二千石爵

右庶長民為父後者一級

本紀

征和二年七月按道侯韓說使者江充等掘蠱太子宮  
壬午太子與皇后謀斬充以節發兵與丞相劉屈氂大  
戰長安死者數萬人庚寅太子亡皇后自殺八月辛亥

太子自殺于湖

本紀

武帝末戾太子敗燕王旦廣陵王胥行驕嫚後元三年  
二月上疾病遂立昭帝為太子年八歲明日武帝崩太

子即皇帝位

昭紀

孝宣地節三年立皇太子大赦天下賜御史大夫爵關

內侯二千石爵右庶長天下當為父後者爵一級

本紀

五鳳元年正月皇太子冠皇太后賜丞相將軍列侯中二千石帛人百匹大夫人八十匹夫人六十匹又賜列

侯嗣子爵五大夫男子為父後者爵一級

本紀

孝成皇帝元帝太子也母曰王皇后元帝在太子宫生甲觀畫堂為世嫡皇孫宣帝愛之字曰太孫常置左右年三歲而宣帝崩元帝即位帝為太子壯好經書寬博謹慎初居桂宮上嘗急召太子出龍樓門不敢絕馳道



西至直城門得絕及度還入作室門上遲之問其故以狀對上大說乃著令令太子得絕馳道云其後幸酒樂燕樂上不以為能而定陶恭王有材執母傅昭儀又愛幸上以故常有意欲以恭王為嗣賴侍中史丹護太子家輔助有力上亦以先帝尤愛太子故得無廢竟寧元年五月元帝崩六月己未太子即皇帝位

成紀

成帝綏和元年二月癸丑詔曰朕承太祖鴻業奉宗廟二十五年德不能綏理宇內百姓怨望者衆不蒙天祐至

今未有繼嗣天下無所係心觀于往古近事之戒禍亂之萌皆由斯焉定陶王欣於朕為子慈仁孝順可以承天序繼祭祀其立欣為皇太子封中山王舅諫大夫馮參為宜鄉侯益中山國三萬戶以慰其意賜諸侯王列侯金天下當為父後者爵三老孝弟力田帛各有差

紀同上

孝哀皇帝元帝庶孫定陶恭王子也母曰丁姬年三歲嗣立為王長好文辭法律元延四年入朝盡從傅相中尉時成帝少弟中山孝王亦來朝獨從傅上怪之以問

定陶王對曰令諸侯王朝得從其國二千石傅相中尉  
皆國二千石故盡從之上令誦詩通習能說他日問中  
山王獨從傅在何法令不能對令誦尚書又廢及賜食  
於前後飽起下鞵係解成帝由此以為不能而賢定陶  
王數稱其材時王祖母傅太后隨王來朝私賂遺上所  
幸趙昭儀及帝舅票騎將軍曲陽侯王根昭儀及根見  
上亡子亦欲豫自結為長久計皆更稱定陶王勸帝以  
為嗣成帝亦自美其材為加元服而遣之時年十七矣

明年使執金吾任宏守大鴻臚持節召定陶王立為皇太子謝曰臣幸得繼父守藩為諸侯王材質不足以假充太子之宮陛下聖德寬仁敬承祖宗奉順神祇宜蒙福祐子孫千億之報臣願且得留國邸旦夕奉問起居俟有聖嗣歸國守藩書奏天子報聞後月餘立楚孝王孫景為定陶王奉恭王祀所以獎厲太子專為後之誼

哀紀

雜錄上

高帝欲廢太子立戚夫人子趙王如意大臣多爭未能得堅決也呂后恐不知所為或謂呂后曰留侯善畫計上信用之呂后乃使建成侯呂澤劫良曰君常為上謀臣今上日欲易太子君安得高枕而卧良曰始上數在急困之中幸用臣策今天下安定以愛欲易太子骨肉之間雖臣等百人何益呂澤彊要曰為我畫計良曰此難以口舌爭也顧上有所不能致者四人四人老年矣皆以上嫚侮士故逃匿山中義不為漢臣然上高此四

人今公誠能毋愛金玉璧帛令太子為書卑辭安車因使辯士固請宜來來以為客時從入朝令上見之則一助也於是吕后令吕澤使人奉太子書卑辭厚禮迎此四人四人至客建成侯所漢十一年黥布反上疾欲使太子往繫之四人相謂曰凡來者將以存太子太子將兵事危矣迺說建成侯曰太子將兵有功即位不益無功則從此受禍且太子所與俱諸將皆與上定天下梟將也今迺使太子將之此無異使羊將狼皆不肯為用

其無功必矣臣聞母愛者子抱今戚夫人日夜侍御趙王常居前上終不使不肖子居愛子上明其代太子位必矣君何不急請呂后承間為上泣言黥布天下猛將善用兵今諸將皆陛下故等夷迺令太子將此屬莫肯為用且布聞之鼓行而西耳上雖疾彊載輜車卧而護之諸將不敢不盡力上雖苦彊為妻子計於是呂澤夜見呂后呂后承間為上泣而言如四人意上曰吾惟之孺子固不足遣迺公自行耳於是上自將而東羣臣居

守皆送至霸上良疾彊起至曲郵見上曰臣宜從疾甚楚人剽疾願上謹毋與楚爭鋒因說上令太子為將軍監關中兵上謂子房雖疾彊卧傳太子是時叔孫通已為太傅良行少傅事漢十二年上從破布歸疾益甚愈欲易太子良諫不聽因疾不視事叔孫通太傅稱說引古以死爭太子上陽許之猶欲易之及宴置酒太子侍四人者從太子年皆八十有餘鬚眉皓白衣冠甚偉上怪問曰何為者四人前對各言其姓名上迺驚曰吾求公避



逃我今公何自從吾兒游乎四人曰陛下輕士善罵臣等義不辱故恐而亡匿今聞太子仁孝恭敬愛士莫不延頸願為太子死者故臣等來上曰煩公幸卒調護太子四人為壽已畢趨去上目送之召戚夫人指視曰我欲易之彼四人為之輔羽翼已成難動矣呂氏真迺主矣

張良傳

叔孫通為太子太傅高帝欲以趙王如意易太子通諫曰昔者晉獻公以驪姬故廢太子立奚齊晉國亂者數

十年為天下笑秦以不早定扶蘇胡亥詐立自使滅祀  
此陛下所親見今太子仁孝天下皆聞之吕后與陛下  
攻苦食啖師古曰當作淡其可背哉陛下必欲廢適而立少臣

願先伏誅以頸血汙地高帝曰公罷矣吾特戲耳通曰  
太子天下本本壹搖天下震動奈何以天下戲高帝曰  
吾聽公及上置酒見留侯所招客從太子入見上遂無  
易太子志矣叔孫通傳

高帝欲廢太子而立戚姬子如意為太子大臣固爭莫

能得上以留侯策止而周昌庭爭之彊上問其說昌為人吃又盛怒曰臣口不能言然臣期期知其不可陛下欲廢太子臣期期不奉詔上欣然而笑即罷吕后側耳於東廂聽見昌為跪謝曰微君太子幾廢

周昌傳

孝文時晁錯為太子舍人門大夫遷博士上書言人主所以尊顯功名揚於萬世之後者以知術數也故人主知所以臨制臣下而治其衆則羣臣畏服矣知所以聽言受事則不欺蔽矣知所以安利萬民則海內必從矣

知所以忠孝事上則臣子之行備矣此四者臣竊為皇太子急之人臣之議或者皇太子亡以知事為也臣之愚誠以為不然竊觀上世之君不能奉其宗廟而劫殺於其臣者皆不知術數者也皇太子所讀書多矣而未深知術數者不問書說也夫多誦而不知其說所謂勞苦而不為功臣竊觀皇太子材智高竒馭射伎藝過人絕遠然於術數未有所守者以陛下為心也竊願陛下幸擇聖人之術可用今世者以賜皇太子因時使太子

陳明於前唯陛下裁察上善之於是拜錯為太子家令  
以其辯得幸太子太子家號曰智囊

晁錯傳

文帝時賈誼上書曰古之王者太子迺生因舉以禮使  
士負之有司齋肅端冕見之南郊見于天也過闕則下  
過廟則趨孝子之道也故自為赤子而教固已行矣昔  
者成王幼在襁抱之中召公為太保周公為太傅太公  
為太師保保其身體傅傅之惠義師道之教訓此三公  
之職也於是為置三少皆上大夫也曰少保少傅少師

是與太子宴者也故迺孩提有識三公三少固明孝仁禮義以道習之遂去邪人不使見惡行於是皆選天下之端士孝悌博聞有道術者以衛翼之使與太子居處出入故太子迺生而見正事聞正言行正道左右前後皆正人也夫習與正人居之不能毋正猶生長於齊不能不齊言也習與不正人居之不能毋不正猶生長於楚之地不能不楚言也故擇其所者必先受業迺得當之擇其所樂必先有習迺得為之孔子曰少成若天性

習貫如自然及太子少長知妃色則入于學學者所學之官也及太子既冠成人免於保傅之嚴則有記過之史徹膳之宰進善之旌誹謗之木敢諫之鼓瞽史誦詩工誦箴諫大夫進謀士傳民語習與智長故切而不媿化與心成故中道若性三代之禮春朝朝日秋暮夕月所以明有敬也春秋入學坐國老執醬而親餽之所以明有孝也行以鸞和步中采齊趣中肆夏所以明有度也其於禽獸見其生不見其死聞其聲不食其肉故遠

庖厨所以長恩且明有仁也夫三代之所以長久者以其輔翼太子有此具也天下之命垂於太子太子之善在於早諭教與選左右夫心未濫而先諭教則化易成也開於道術智誼之指則教之力也若其服習積貫則左右而已臣故曰選左右早諭教最急夫教得而左右正則太子正矣太子正而天下定矣

賈誼傳


太子與梁王共車入朝不下司馬門張釋之追止太子梁王毋入殿門遂劾不下公門不敬奏之薄太后聞之



文帝免冠謝曰教兒子不謹薄太后使使承詔赦太子

梁王然後得入文帝由是奇釋之

張釋之傳



西漢會要卷三

欽定四庫全書

史部

西漢會要卷四  
十三

詳校官編修臣范來宗

編修臣程嘉謨覆勘

總校官知縣臣楊懋珩

校對官編修臣盧遂

謄錄監生臣李國興

欽定四庫全書

西漢會要卷四

帝系四

皇太子下

雜錄下

孝景前三年梁孝王入朝是時上未置太子與梁王言

曰千秋萬歲後傳於王王辭謝雖知非至言然心內喜

明年漢立太子前七月上廢栗太子太后心欲以梁王

宋

徐天麟撰

為嗣大臣及爰盎等有所關說於帝太后議格孝王不敢復言太后以嗣事

文三  
王傳

景帝弟梁孝王母竇太后愛之孝王朝因燕昆弟飲是時上未立太子酒酣上從容曰千秋萬歲後傳王太后驩竇嬰引卮酒進上曰天下者高祖天下父子相傳漢之約也上何得以傳梁王太后由此憎嬰嬰亦薄其官

竇嬰  
傳

武帝春秋二十九迺得皇子枚臯與東方朔作皇太子

生賦及立皇子禰祝受詔所為皆不從故事重皇子也

枚乘  
傳

孝武皇帝六男衛皇后生戾太子據元狩元年立為皇太子年七歲矣初上年二十九乃得太子甚喜為立禰使東方朔枚臯作禰祝少壯詔受公羊春秋又從瑕丘江公受穀梁及冠就宮上為立博望苑使通賓客從其所好故多以異端進者武帝末衛后寵衰江充用事充與太子及衛氏有隙恐上晏駕後為太子所誅會巫蠱

事起克因此為姦是時上春秋高意多所惡以為左右皆為蠱道祝詛窮治其事丞相公孫賀父子陽石諸邑公主及皇后弟子長平侯衛伉皆坐誅克典治巫蠱既知上意白言宮中有蠱氣入宮至省中壞御座掘地上使按道侯韓說御史章贛黃門蘇文等助克克遂至太子宮掘蠱得桐木人時上疾辟暑甘泉宮獨皇后太子在太子召問少傅石德德懼為師傅并誅因謂太子曰前丞相父子兩公主及衛氏皆坐此今巫與使者掘地

得徵驗不知巫置之邪將實有也無以自明可矯以節  
收捕亢等繫獄窮治其姦詐且上疾在甘泉皇后及家  
吏請問皆不報上存亡未可知而姦臣如此太子將不  
念秦扶蘇事邪太子急然德言征和二年七月壬午乃  
使客為使者收捕亢等按道侯說疑使者有詐不肯受詔  
客格殺說御史章贛被創突亡自歸甘泉太子使舍人  
無且持節夜入未央宮殿長秋門因長御倚華具白皇  
后發中殿車載射士出武庫兵發長樂宮衛告令百官



曰江亢反迺斬亢以徇炙胡巫上林中遂部賓客為將率與丞相劉屈氂等戰長安中擾亂言太子反以故眾不附太子兵敗亡不得上怒甚羣下憂懼不知所出壺闕三老茂上書曰臣聞父者猶天母者猶地子猶萬物也故天平地安陰陽和調物迺茂成父慈母愛家室之中子迺孝順陰陽不和則萬物夭傷父子不和則室家喪亡故父不父則子不子君不君則臣不臣雖有粟吾豈得而食諸昔者虞舜孝之至也而不中於瞽叟孝已

被謗伯奇放流骨肉至親父子相疑何者積毀之所生也  
由是觀之子無不孝而父有不察今皇太子為漢道  
嗣承萬世之業體祖宗之重親則皇帝之宗子也江充  
布衣之人閭閻之隸臣耳陛下顯而用之銜至尊之命  
以迫蹙皇太子造飾姦詐羣邪錯謬是以親戚之路隔  
塞而不通太子進則不得上見退則困於亂臣獨冤結  
而亡告不忍忿忿之心起而殺充恐懼逋逃子盜父兵  
以救難自免耳臣竊以為無邪心詩曰營營青蠅止于

藩豈弟君子無信讒言讒人罔極交亂四國往者江亢  
讒殺趙太子天下莫不聞其罪固宜陛下不省察深過  
太子發盛怒舉大兵而求之三公自將智者不敢言辯  
士不敢說臣竊痛之臣聞子胥盡忠而忘其號比干盡  
仁而遺其身忠臣竭誠不顧鈇鉞之誅以陳其愚志在  
正君安社稷也詩云取彼讒人投畀豺虎唯陛下寬心  
慰意少察所親毋患太子之非亟罷甲兵無令太子久  
亡臣不勝惓惓出一旦之命待罪建章闕下書奏天子

感寤太子之亡也東至湖藏匿泉鳩里主人家貧常賣  
屨以給太子太子有故人在湖聞其富贍使人呼之而  
發覺吏圍捕太子太子自度不能脫即入室距戶自經  
山陽男子張富昌為卒足蹋開戶新安令史李壽趨抱  
解太子主人公遂格鬪死皇孫二人皆并遇害上既傷  
太子乃下詔曰蓋行疑賞所以申信也其封李壽為邗  
侯張富昌為題侯久之巫蠱事多不信上知太子惶恐  
無他意而田千秋復訟太子寃上遂擢千秋為丞相而

族滅江亢家焚蘇文於橫橋上及泉鳩里加兵刃於太子者初為北地太守後族上憐太子無辜乃作思子宮為歸來望思之臺於湖天下聞而悲之

庚太子傳

宣帝地節三年立皇太子選丙吉為太傅疏廣為少傅數月吉遷御史大夫廣徙為太傅廣兄子受字公子亦以賢良舉為太子家令受好禮恭謹敏而有辭宣帝幸太子宮受迎謁應對及置酒宴奉觴上壽辭理閑雅上甚驩說頃之拜受為少傅太子外祖父特進平恩侯許

伯以為太子少白使其弟中郎將舜監護太子家上以問廣廣對曰太子國儲副君師友必於天下英俊不宜獨親外家許氏且太子自有太傅少傅官屬已備今復使舜護太子家親陋非所以廣太子德於天下也上善其言以語丞相魏相相免冠謝曰此非臣等所能及廣繇是見器重數受賞賜太子每朝因進見太傅在前少傅在後父子並為師傳朝廷以為榮

疏廣傳

太子既壯大柔仁好儒見宣帝所用多文法吏以刑名

繩下大臣楊惲蓋寬饒等坐刺譏辭語為罪而誅嘗侍  
侍燕從容言陛下持刑大深宜用儒生宣帝作色曰漢  
家自有制度本以霸王道雜之奈何純任德教用周政  
乎且俗儒不達時宜好是古非今使人眩於名實不知  
所守何足委任迺歎曰亂我家者太子也繇是疏太子  
而愛淮陽王曰淮陽王明察好法宜為吾子而王母張  
婕妤尤幸上有意欲用淮陽王代太子然以少依許氏  
俱從微起故終不肯焉

元紀

張婕妤有寵於宣帝霍皇后廢後上欲立張婕妤為后久之懲艾霍氏欲害皇太子迺更選後宮無子而謹重者迺立長陵王婕妤為后令母養太子后無寵希御見唯婕妤最幸子淮陽憲王壯大好經書法律聰達有材帝甚愛之太子寬仁喜儒術上嗟歎憲王曰真我子也嘗有意欲立張婕妤與憲王然因太子起於微細上少依倚許氏及即位而許后以弑死太子蚤失母故弗忍也久之上以韋玄成遜侯兄經明行高稱於朝廷迺召



拜玄成為淮陽中尉欲感諭憲王輔以推遜之臣由是

太子遂安

淮陽憲王傳

元帝即位史丹為駙馬都尉侍中出常驂乘甚有寵上以丹舊臣皇考外屬親信之詔丹護太子家是時傳昭儀子定陶共王有材藝子母俱愛幸而太子頗有酒色之失母王皇后無寵建昭之間元帝被疾不親政事留好音樂或置輦鼓殿下天子自臨軒檻上墮銅丸以擲鼓聲中嚴鼓之節後宮及左右習知音者莫能為而定

陶王亦能之上數稱其材丹進曰凡所謂材者敏而好學溫故知新皇太子是也若乃器人於絲竹鼓鼙之間則是陳惠李微高於匡衡可相國也於是上嘿然而笑其後中山哀王薨太子前弔哀王者帝之少弟與太子游學相長大上望見太子感念哀王悲不能自止太子既至前不哀上大恨曰安有人不慈仁而可奉宗廟為民父母者乎上以責謂丹丹免冠謝上曰臣誠見陛下哀痛中山王至以感損向者大子當進見臣竊戒屬母

涕泣感傷陛下罪迺在臣當死上以為然意迺解丹之  
輔相皆此類也竟寧元年上寢疾傳昭儀及定陶王常  
在左右而皇太子希得進見上疾稍侵意忽忽不平數  
問尚書以景帝時立膠東王故事是時太子長舅陽平  
侯王鳳為衛尉侍中與皇太子皆憂不知所出丹以親  
密臣得侍視疾候上間獨寢時丹直入卧内頓首伏青  
蒲上涕泣言曰皇太子以適長立積十餘年名號繫於  
百姓天下莫不歸心臣子見定陶王雅素愛幸今者道

路流言為國生意以為太子有動搖之議審若此公卿  
以下必以死爭不奉詔臣願先賜死以示羣臣天子素  
仁不忍見丹涕泣言又切至上意大感喟然太息曰吾  
日困劣而太子兩王幼少意中戀戀亦何不念乎然無  
有此議且皇后謹慎先帝又愛太子吾豈可違指駙馬  
都尉安所受此語丹即却頓首曰愚臣妄聞罪當死上  
因納謂丹曰吾病寢加恐不能自還善輔道太子毋違  
我意丹墮涕而起太子由是遂為嗣矣

史丹傳

綏和中上即位二十五年無繼嗣至親有同產弟中山孝王及同產弟子定陶王在定陶王好學多材於帝子行而王祖母傳太后陰為王求漢嗣私事趙皇后昭儀及帝舅大司馬驃騎將軍王根故皆勸上上於是召丞相翟方進御史大夫光右將軍廉褒後將軍朱博皆引入禁中議中山定陶王誰可為嗣者方進根以為定陶王帝弟之子禮曰昆弟之子猶子也為其後者為之子也定陶王宜為嗣褒博皆如方進根議孔光獨以為禮

立嗣以親中山王先帝之子帝親弟也以尚書般庚殷之  
及王為比中山王宜為嗣上以禮兄弟不相入廟又皇  
后昭儀欲立陶王故遂立為太子光以議不中意左遷

廷尉

孔光傳

皇子

太上皇四男高祖兄伯蚤卒追封武哀侯高后六年追  
封武哀王次兄仲名喜初封宜信侯漢六年立為代王  
匈奴攻代仲棄國自歸天子不忍致法廢為合陽侯楚

元王交高祖同父少弟也自有傳

以本紀及吳王濞傳修

高皇帝八男呂后生孝惠帝曹夫人生齊悼惠王肥薄

姬生孝文帝戚夫人生趙隱王如意趙姬生淮南厲王

長諸姬生趙幽王友趙共王恢燕靈王建

高五王傳

孝文皇帝四男竇皇后生孝景帝梁孝王武諸姬生代

孝王參梁懷王揖

文三王傳

孝景皇帝十四男王皇后生孝武皇帝栗姬生臨江閔

王榮河間獻王德臨江哀王闕程姬生魯共王餘江都

易王非膠西王端賈夫人生趙敬肅王彭祖中山靖

王勝唐姬生長沙定王發王夫人生廣川惠王越膠東

康王寄清河哀王乘常山憲王舜

景十三王傳

孝武皇帝六男衛皇后生戾太子趙婕妤生孝昭帝王

夫人生齊懷王閔李姬生燕刺王旦廣陵厲王胥李夫

人生昌邑哀王髡

武五子傳

孝宣皇帝五男許皇后生孝元帝張婕妤生淮陽憲王

欽衛婕妤生楚孝王躡公孫婕妤生東平思王宇戎婕



孖生中山哀王竟

宣元六  
王傳

孝元皇帝三男王皇后生孝成帝傳昭儀生定陶共王

康馮昭儀生中山孝王興

宣元六  
王傳

雜錄

五宗

司馬遷傳作五宗世家師古曰景帝子凡十三人為王而母五人所生遷謂同母者為一宗故云五

宗也

西漢會要卷四

欽定四庫全書

西漢會要卷五

宋 徐天麟 撰

帝系五

諸侯王

漢興之初海內新定同姓寡少懲戒亡秦孤立之敗於是割裂疆土立二等之爵功臣侯者百有餘邑尊王子弟大啟九國自鴈門以東盡遼陽為燕代常山以南太行

左轉度河濟漸於海為齊趙穀泗以往奄有龜蒙為梁  
楚東帶江湖薄會稽為荆吳北界淮瀕略廬衡為淮南  
波漢之陽亘九嶷為長沙諸侯比境周匝三垂外接胡  
越天子自有三河東郡潁川南陽自江陵以西至巴蜀  
北自雲中至隴西與京師內史凡十五郡公主列侯頗  
邑其中而藩國大者跨州兼郡連城數十宮室百官同  
制京師可謂矯枉過其正矣雖然高祖創業日不暇給  
孝惠享國又淺高后女主攝位而海內晏如亡狂狡之

憂卒折諸呂之難成大宗之業者亦賴之於諸侯也然  
諸侯原本以大末流濫以致溢小者淫荒越法大者睽  
孤橫逆以害身喪國故文帝采賈生之議分齊趙景帝  
用鼂錯之計析吳楚武帝施主父之冊下推恩之令使  
諸侯王得分戶邑以封子弟不行黜陟而藩國自析自  
此以來齊分為七趙分為六梁分為五淮南分為三皇  
子始立者大國不過十餘城長沙燕代雖有舊名皆亡  
南北邊矣景遭七國之害抑損諸侯減黜其官武有衡

山淮南之謀作左官之律設附益之法諸侯惟得衣食  
稅租不與政事至於哀平之際皆繼體苗裔親屬踈遠  
生於帷牆之中不為士民所尊執與富室亡異而本朝  
短世國統三絕是故王莽知漢中外殫微本末俱弱亡  
所忌憚生其姦心因母后之權假伊周之稱顓作威福  
廟堂之上不降階序而運天下詐謀既成遂據南面之  
尊分遣五威之吏馳傳天下班行符命漢諸侯王厥角  
稽首奉上璽駭惟恐在後或迺稱美頌德以求容媚豈

不哀哉

諸侯王表

雜錄

諸侯王金璽盤綬掌治其國

百官表

高帝王子弟犬牙相制所謂盤石之宗也

文紀

悼惠之王齊最為大國以海內初定子弟少激秦孤立  
亡藩輔故大封同姓以填天下時諸侯得自除御史大夫  
羣卿以下衆官如漢朝漢獨為置丞相自吳楚誅後  
稍奪諸侯權左官附益阿黨之法設其後諸侯惟得衣

食租稅貧者或乘牛車

高五王贊

高皇帝規土連城布王子孫是以支葉扶疏異姓不得

間也

燕刺王傳

文帝時賈誼上疏曰高皇帝以明聖威武即天子位割膏腴之地以王諸公多者百餘城少者乃三四十縣惠至渥也然其後十年之間反者九起諸王雖名為臣實皆有布衣昆弟之心慮亡不帝制而天子自為者擅爵人赦死罪甚者或戴黃屋漢法令非行也欲天下治安

莫若衆建諸侯而少其力力少則易使以義國小則亡邪  
心令海內之執如身之使臂臂之使指莫不制從諸侯之  
君不敢有異心輻湊並進而歸命天子雖在細民且知其  
安故天下咸知陛下之明割也定制令齊趙楚各為若干  
國使悼惠王幽王元王之子孫畢以次各受祖之分地地盡  
而止及燕梁它國皆然其分地衆而子孫少者建以為國空  
而置之須其子孫生者舉使君之諸侯之地其削頗入漢者  
為徙其侯國及封其子孫也所以數償之

臣天麟按也字  
合作他傳寫之



誤也所字  
合屬上句

一寸之地一人之衆天子亡所利焉誠以定治而已故天下咸知陛下之廉地制壹定宗室子孫莫慮不王下無倍畔之心上無誅伐之志故天下咸知陛下之仁法立而不犯令行而不逆貫高利幾之謀不生柴竒開章之計不萌細民鄉善大臣致順故天下咸知陛下之義卧赤子天下之上而安植遺腹朝委裘而天下不亂當時大治後世誦聖壹動而五業附陛下誰憚而久不為此

賈誼傳

景帝即位鼂錯為御史大夫請諸侯之罪過削其支郡諸

侯謹諱吳楚七國反以誅錯為名丞相劾奏錯當要斬  
錯已死謁者僕射鄧公見上曰鼂錯患諸侯彊大不可  
制故請削地以尊京師萬世之利也計畫始行卒受大  
戮臣竊為陛下不取也於是景帝喟然長息曰公言善  
吾亦恨之

鼂錯傳

景帝中五年令諸侯王不得復治國天子為置吏

百官表

武帝初即位大臣懲吳楚七國行事議者多寬鼂錯之  
策皆以諸侯連城數十泰強欲稍侵削數奏暴其過惡

諸侯王自以骨肉至親先帝所以廣封連城犬牙相錯者為盤石宗也今或無罪為臣下所侵辱有司吹毛求疵笞服其臣使證其君多自以侵寃建元三年王登長沙王發中山王勝濟川王明以來朝天子置酒勝聞樂聲而泣問其故對曰臣聞悲者不可為繁歆思者不可為歎息故高漸離擊筑易水之上荆軻為之低而不食雍門子壹微吟孟嘗君為之於邑今臣心結日久每聞竊眇之聲不知涕泣之橫集也夫衆虛漂山聚蟻成雷

朋黨執虎十夫撓椎是以文王拘於牖里孔子阨於陳  
蔡此乃烝庶之成風增積之生害也臣身遠與寡莫為  
之先衆口鑠金積毀銷骨叢輕折軸羽翮飛肉紛驚逢  
羅潜然出涕臣聞白日曬光幽隱皆照明月曜夜蝨蝨  
宵見然雲蒸列布杳冥晝昏塵埃拂覆不見泰山何則  
物有蔽之也今臣雍闕不得聞讒言之徒蠡生道遼路  
遠曾莫為臣聞臣竊自悲也臣聞社鼯不灌屋鼠不熏  
何則所託者然也臣雖薄也得蒙肺附位雖卑也得為

東藩屬又稱兄今羣臣非有葭莩之親鴻毛之重羣居  
黨議朋友相為使夫宗室擯卻骨肉冰釋斯伯奇所以  
流離比干所以橫分也詩云我心憂傷惄焉如擣假寐  
永歎唯憂用老心之憂矣疚如疾首臣之謂也具以吏  
所侵聞於是上乃厚諸侯之禮省有司所奏諸侯事加  
親親之恩焉其後更用主父偃謀令諸侯以私恩自裂  
地分其子弟而漢為定制封號輒別屬漢郡漢有厚恩  
而諸侯地稍自分析弱小云

中山靖  
王傳

元狩六年四月乙巳廟立皇子閔為齊王旦為燕王胥  
為廣陵王初作誥武紀

王子侯

主父偃說武帝曰古者諸侯地不過百里疆弱之形易  
制今諸侯或連城數十地方千里緩則驕奢易為淫亂  
急則阻其疆而合從以逆京師今以法割削則逆節萌  
起前日晁錯是也今諸侯子弟或十數而適嗣代立餘  
雖骨肉無尺地之封則仁孝之道不宣願陛下令諸侯

得推恩分子弟以地侯之彼人人喜得所願上以得施

實分其國必稍自銷弱矣於是上從其計

主父偃傳

武帝元朔二年春正月詔曰梁王城陽王親慈同生願

臣邑分弟其計之諸侯王請與子弟邑者朕將親覽使

有列位於是藩國始分而子弟畢侯矣

本紀

大哉聖祖之建業也後嗣承序以廣親親至於孝武以

諸侯王疆土過制或僭差失軌而子弟為匹夫輕重不

相準於是制詔御史諸侯王或欲推私恩分子弟邑者

令各條上朕且臨定其號名自是支庶畢侯矣

表上

孝元之世亡王子侯者盛衰終始豈非命哉元始之際  
王莽擅朝偽褒宗室侯及王之孫焉居攝而愈多非其  
正故弗錄旋踵亦絕悲夫

表下

孝平元始元年封宣帝耳孫信等三十六人皆為列侯

本紀

### 宗室

高祖七年置宗正官以叙九族

本紀又百官表  
云影正出屬籍

孝惠內修親親

本贊



文帝詔曰諸侯王宗室昆弟功臣多賢及有德者

紀本

四年復諸劉有屬籍者家士所與

紀本

孝景三年楚元王子藝等與濞等為逆朕不忍加法除

其籍毋令汙宗室

紀本

孝武元光元年復七國宗室前絕屬者

紀本

後元二年正月朝諸侯于甘泉宮賜宗室

紀本

武帝時劉辟彊以宗室子隨二千石論議冠諸宗室清

靜少欲常以書自娛不肯仕昭帝即位或說大將軍霍

光曰將軍不見諸呂之事乎處伊尹周公之位攝政擅權而背宗室不與共職是以天下不信卒至於滅亡今將軍當盛位帝春秋富宜納宗室又多與大臣共事反諸呂道如是則可以免患光然之迺擇宗室可用者辟

彊子德待詔丞相府

楚元王傳

孝昭始元二年以宗室母在位者舉茂材劉辟彊劉長

樂皆為光祿大夫辟彊守長樂衛尉

本紀

元鳳二年四月上自建章宮徙未央宮賜宗室子錢人

二十萬

本紀

四年正月丁亥帝加元服賜列侯宗室金帛牛酒各有

差

本紀

孝宣地節元年六月詔曰蓋聞堯親九族以和萬國朕蒙遺德奉承聖業惟念宗室屬未盡而以罪絕若有賢

材改行勸善其復屬使得自新

本紀

地節四年劉德以宗正闕內侯行謹重為宗室率封陽

城侯

恩澤侯表

成帝時劉向上封事言王氏一姓朱輪華轂者二十三  
人大將軍秉事用權五侯驕奢排擯宗室孤弱公族其  
有智能者尤非毀而不進遠絕宗室之任不令得給事  
朝省恐其與己分權事執不兩大王氏與劉氏且不並  
立宜發明詔吐德音接近宗室親而納信黜達外戚毋  
授以政所以褒睦外內之姓子子孫孫無疆之計也

劉向傳

建始二年罷博望苑以賜宗室朝請者

本紀

哀帝即位賜宗室王子有屬者馬各一駟

本紀

平帝元始元年詔宗室屬未盡而以罪絕者復其屬其

為吏舉廉佐史補四百石

本紀師古曰宗室為吏者皆令舉廉各從本秩而依廉吏

選之為佐史者  
例補四百石

四年二月賜宗室有屬籍者爵目五大夫以上各有差

本紀

五年正月祫祭明堂宗室子九百人召助祭禮畢皆益

戶賜爵及金帛增秩補吏各有差詔曰蓋聞帝王以德

撫民其賜親親以相及也昔堯睦九族舜惇叙之朕以

皇帝幼年且統國政惟宗室子皆太祖高皇帝子孫及

兄弟吳頃楚元之後漢元至今十有餘萬人雖有王侯之屬莫能相糾或陷入刑罪教訓不至之咎也傳不云虐君子篤於親則民興於仁其為宗室自太上皇以來族親各以世氏郡國置宗師以糾之致教訓焉二千石選有德義者以為宗師考察不從教令有寃失職者宗師得因郵亭書言宗伯請以聞常以歲正月賜宗師帛各十匹

本紀

# 雜錄

高皇帝規土連城布王子孫是以支葉扶疏異姓不得

間也

燕刺王傳

大雅卓爾不羣河間獻王近之

景十三王贊

劉德召見甘泉宮武帝謂之千里駒

傳

肺附

中山靖王勝傳又劉向傳

同姓末屬

劉向

宗室遺老

上

河間王良宗室儀表

宗英

叙傳

元狩五年沈猷侯受坐為宗正聽請不具宗室耐為司

冠  
王子  
侯  
表



西漢會要卷五